



ATASSUT
Steen Lyngé

UKA 2016/98
07. 10. 2016

Siunissaq qiviarlugu qanoq iluuseqarluta isumaginnermut ingerlatsinitsinni atorfinitsinikkut, ilinniartitsinikkut, pikkorissaaqqinnikkut sulisunillu ilinniarsimasunik annaasaqannginnissarput qulakkeerumallugit 2017-imi ukiakkut ataatsimiinnissami saqqummiunneqartussamik periusissanut iliuusissanullu pilersaarusiornissaannik Naalakkersuisut peqquneqarnissaannik Inatsisartut aalajangiiffigisassaannik siunnersuut.
(Inatsisartunut ilaasortaq Peter Olsen, Inuit Ataqatigiit)

Aallarniutungalugu Inatsisartunut ilaasortaq Peter Olsen, Inuit Ataqatigiinneersoq ATASSUT sinnerlugu qutsavigissavarput siunnersuummik imartuumik pingaarutilimmillu saqqummiussaqaarneranut.

ATASSUT-mit siunnersuuteqartoq paasilluarsinnaavarput, nunatsinni ajoraluartumik sineriatitsinni pingaartumillu Nuummi isumaginninnermi suliassat annertusiartortillugit aammalu ilaatigut sakkortusiartortillugit, isumaginninnermi ingerlatsinermi atorfilittat sulinerminni atugarisaasa isiginiarneqartariaqarneri.

Taamaattumik aamma ATASSUT-mit Naalakkersuisooqatigiinnissamut isumaqatigiissut naapertorlugu tamatumap iliuuseqarfigineqarnissaa siunertaralugu suliniuteqarfigineqalernera naammagisimaarparput.

Inuiaqatigiittulli minnerunngitsumillu aamma naalakkersuinermik suliaqartuusugut, ajornartorsiutit pinngoreersut iliuuseqarfiginiarneqartarneri suliassatta pingaarutillit ilagivaat. ATASSUT-mili isumaqarpugut ajornartorsiutit pinaveersimatinnissaannut pikkorinnerulertariaqartugut. Toqqissilluni inuuneq innuttaasut tamarmik, naalugiarsunniit utoqqarnut, tamatta pisinnaatitaaffigisariaqarparput. Taamaattumik inuunerinnerulernissamut aqqutissiuuseqatigiinnissarput tamatta akisussaaffigaarput. Imaanngitsoq naalakkersuinikkut suliallit kisimik tamanna

akisussaaffigissagaat - inuup nammineq inuunini akisussaaffigalugu pisussaaffigivaa, naalakkersuinikkulli toqqissimasumik inuuneqarsinnaanermut inatsisitigut sinaakktissanik suliaqartussaavugut, tassanilu aamma pisussaaffigaarput piffiit allanngoriartorneri naapertorlugit aamma naleqqussaasinnaaneq.

ATASSUT-mi sulinitisinni pingaartitarilluinnakkatta ilagaat, inoqativut kikkulluunniit sunilluunniit suliaqarpata ataqqillugit tulluusimaarutigisariaqarivut, tassuunakkummi sulinermi kajumissuseq, sulianullu kajumittitsineq pilersinneqartarmat. Taamaattumik ATASSUT-mit siunnersuuteqartoq tunngaviumik isumaqatigaarput sulisut sulisoriinnarneqarnissaannut periusissanik ujartuerusunnera.

Manna iluatsillugu ATASSUT-mit isummersuutissatut ilaatigut aamma anngussilaarusuppugut, isumaqaratta atorfinitisarnermi periaatsit nalilersorneqartariaqartut ilagilluinnaraat imaluunniit suli atorfinitisinnginnermi nalilersoqqissaarneqartariaqartut inuttut piginnaasat suunersut, inuttummi qajannaatsuunissaq aamma pisariaqartarmat - ilaatigummi immaqa aamma ajornangippallaarsinnaavoq oqaannassalluni isumaginninnermi siunnersortsitut ilinniarsimammat atorfinitseriaannaasasoq. Minnerunngitsumillu aamma isiginiagassat ilagaat isumaginninnermi siunnersortit sulinerminni nalagarisaasa sulisuminnut ataqqinnittuullutik aamma sulisorisami suliannut kajumittitsilertuunissaat.

ATASSUT-mittaaq aamma isumaqarpugut pingaaruteqarluinnartut ilagigaat isumaginninnermi siunnersortit allallu isumaginninnermi atorfilittat sulinermi atugassarititat, aningaasarsiat, ilinniaqqittarnerit il.il. atorfeqarnermi kattuffinnut attaveqarnermikkut annguttarumaaraat, tassuunakkummi aamma nikisitsiartuartaqarsinnaammat eqeersimaartumik kattuffeqarnikkut, aamma atugassarititat suuneri qanorlu pitsannqorsarsinnaaneri erseqqarinninngortinneqarsinnaalersarmata.

Taamatut ATASSUT-mit oqaaseqarluta siunnersuutip itigartinneqarnissaa inassutigissavarput, suli at pineqartut aallartinneqareersimammata, taamaattorli ATASSUT-mit ammaffigaarput suliaq ataatsimiitsitaliamut susassaqtumut ingerlateqqinneqassappat, sulianut ingerlareersunulluunniit tapunneqassappat.

Qujanaq!